

AGENDRE TRINITATIS

MINGGU 31 AGUSTUS 2025

1. FANGOWAI BA FOGAONI

(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).

- Fangowai** :
SA : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.
SATO : Ya'ahowu !
SA : Ya faofao khömi Lowalangi...
SATO : Ya fao Khöu Geheha-Nia
Fogaoni :
SA : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero : 9**

9. BÖI TEBATO WANUNOGU

do = es 4/4
MM = 96 - 104

1. Böi tebato wanunogu, Lowalangi So'aya.
Fa'auri ba siso khögu, ya oi sumange-Nia.
Ha sambalö fa'omasi, ba fa'ebua dödö,
mbuala Lowalangi, ba zamati sanau'ölö.
Lö faröi sa Zo'aya, he adudu danöda.
2. No töra moroi khö nina, wendroro ononia,
Wamaeri Yesu So'aya, ya'o tana khö-Nia.
Me omasi Lowalangi, na auri göi ndra'odo.
Andrö wa no Ikaoni, afu u'o'ö Keriso.
Lö faröi sa Zo'aya, he adudu danöda.

2. FANGA'ARO'Ö WA'OWULO (VOTUM)

- SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):
No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

SATO : YADUHU

- SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gahe ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. HALELUYA.....

SA : **Manunö** : BZ. : 452

Haleluya..... Haleluya..... Haleluya.....

- SA** : Mangandrö ita :
He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö

bangawalö gabula dödö, tundrehehi faböi alau ndra'aga. Fatöröga ba zomasi Ndra'ugö irugi gamozua, fa makhamö nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. (Mudadao zato)

3. MANUNÖ moroi ba Mbuku Zinunö Numero : 272

272. SOROI DÖDÖ, SOROI DÖDÖ

Lala : Röfa Yesu Röfa Yesu (No. 106)

do = bes 3/4

MM = 88 - 96

1. Soroi dödö, soroi dödö, möido u'ondrasi Yesu.
Oi u'erogö zi taya, sanaisi ya'o ba lala
ha Yesu ni'o'ögu.
2. Omasido, omasido, Yesu, si möi mangatulö.
Ha khö-Nia so wangepa, me sahakhö tödö Ia,
na so wangesa dödö.

4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura
Amaedola 25:2-6

2. Ba Lowalangi, ba fangebua duriania, na ibini'ö hadia ia, ba ba razo niha, ba fangebua duria, na la'alui sibai, na so hadia ia.
3. Si mane fa'alawa mbanua si yawa ba si mane fa'abakha danö si tou, si manö göi dödö razo, wa tebai tesöndra.
4. Na laheta gakhözila ba wirö, ba mofozu gamagama nifazökhi duka gana'a.
5. Nifofanö ba ngai razo zolau si lö sökhi, ba möi fangaro dadaomania wa'atulö.
6. Böi mohokha ndra'ugö föna razo, ba böi bali'ö nahau naha zebua.

Simanö daroma Li Lowalangi, da tatema'ö faoma sinunö: BZ.Numero 20:1

BZ. No: 20. MISUNOSUNO ZO'AYA

1. Misunosuno Zo'aya, mi bè zumange-Nia.
Mi'ebua'ö döi-Nia, sotöi banua-Nia.
Me no Ikaoni göi ami, afu mitemawa'au ri, khö Yesu, Sangorifi.

5. FANGANDRÖ FANGEFA HORÖ

SA : Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

Mangandrö ita :

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna höröma si no mafalua i'otarai iraono ndra'aga, he ba wehedema, era'era dödöma, awö gamuatama si lö faudu ba daroma Li-Mö. Andrö möiga khö-

U ba wangandrö fa'ahakhö dödö-U, ena'ö Ö'efa'ö khöma horöma andrö si no mafalua, irege sohahau tödö ndra'aga wanohugö fekolima ba zi so fönama si faudu ba zomasi Ndra'ugö. Hakhösi dödö-U khöma Ama, ba be'e aefa khöma horöma andrö ma'afefu, Yaduhu.

SATO : Manunö : BZ. Numero 224 : 1

224. NA'UBINI'Ö HORÖGU KHÖ YESU

1. Na'ubini'ö horögu khö Yesu, ba lö usöndra zahono dödögu U'ombakha'ö ngawalö horögu, mo lala dödö.

SA : **Turia Wangefa horö** : "Utayaigö golalöwamö, si mane lawuo, awö horöu, si mane sau. Tema fuli'ö khö-Gu, me no U'orifi ndra'ugö. LAKHÖMI KHÖ LOWALANGI SI YAWA.....

SATO : Manunö:

450. BA FA'ATULÖ BA GULIDANÖ

1. Ba fa 'a tulö ba gulidanö ba niha ni'omasi 'ö andrö
(mudadao zato)

6. FOMBASO TAROMA LI LOWALANGI FÖNA HUHUU (AB)

: Da tafondrondrongo daroma Li Lowalangi, tehalö moroi ba zura **Mataio 23:1-11**

1. Ba humede Yesu ba niha sato ba khö ndra nifahaönia, imane:
2. Ba dadaoma Moze dumadao zangila amakhoita andrö ba farizaio.
3. Ba fefu hadia ia, niwa'öra khömi, ba mi'o'ö, böi misawö, ba böi mi'o'ö ba mbuabuara; lawa'öwa'ö sa, ba lö latörö.
4. Ba laböbö noro sabua ba lahare'ö ba galisi niha, ba ya'ira, ba sara turura lö labe'e, ba wamaliwa ya'ia.
5. Afu'afura la'ila ira niha, andrö lalau fefu nilaura andrö. La'ebolo'ö sa zura wangerangera andrö khöra, ba la'ebua'ö mbowobowo mbarura andrö.
6. Ba no omasi ira naha tánö si yawa ba gowulöa ba dadaoma tánö si yawa ba zekola;
7. ba omasi ira na la'owai ira ba kade, ba na labe'e töira zamahaö niha tánö bö'ö.
8. Ba böi ndramube'e töimi zamahaö, ha sa samösa zamahaö ya'ami, ba si fatalifusö ami fefu.
9. Ba böi fa'ama ami ba niha ba guli danö, ha sa samösa Namami, si so ba zorugo.
10. Ba böi ndramaube'e töimi zolohe, me ha samösa zolohe ya'ami, Keriso.
11. Enonimi zebuami.

Ya'ahowu zamondrongo taroma li Lowalangi ba same'e ba dödö.

SA+SATO : Yaduhu

7. FASÖMBATA

SA : Iada'e tebe'e khöda ginötö ba wolohe fasömbata khö Lowalangi. Ta'osamuzaiigö wame'e, he fasömbata si föföna, ba simanö göi zi mendrua awö zi medölu sifao fangowuloi fasömbata kasih. Ba si föföna ua da tafondrondrongo Li Lowalangi me imane:

- ❖ Same'e sumange fangandrö saohagölö, da'ö zamolakhömi Ya'odo, ba zi lö sinegu ba mbuabuania U'oroma'ö wangorifi andrö khö Lowalangi.

SA : Tafa'ema wasömbata khö Lowalangi, manunö ita moroi ba Mbuku Zinunö
Numero : 22

22. YESU HA UBÈ FANUNO

do = bes 4/4
MM = 96 - 104

1. Yesu, ha ubè fanuno, wa'ebua dödö-Mö.
He'uwisa wamatunö, fa'atulö nilau-Mö.
He So'aya, samatörö, si lö ambö fa'abölö.
Be'e khögu Geheha-U, sango'ou ba samahaö.
2. Ae dönisi göi dödögu, wanöngöni nilau-Mö.
Ba bokai hörö dödögu, fa u'ila dödö-Mö.
No fahöna wa'omasi, fatolosa, fangorifi.
Fa'ahakhö dödö-Mö, fefu mbörö ba da'ö.
3. He abu sibai dödögu, na gönado fotu-Mö.
Ba wangoroma'ö khögu, fa'omasi-Mö andrö.
Da'ö lala ba wogaoni, ya'odo ba wangorifi.
Lö omasi Ndra'ugö, na te'ala ndra'odo.
4. Fondrorogö nama ono, wondrorogö-Mö ya'o.
Hulö ae ba gafi moyo, wolohe-Mö ya'odo.
Na so mbaho fama'ala, Ötaya fa böi te'ala.
Na so hili wamakao, Ö'onoro, Öfasao
5. No fahöna howuhowu, ha wa'oya mbuala-U.
No Ötandrösaigö khögu, wangorifi mbanua-U.
Ha khö-U u'ohe zinunö, ba fangandrö saohagölö.
Ya sumange-Mö ndra'o, khö-U ululu ndra'odo.

Na no awai la'owuloi/lafa'ema wasömbata, ba owulo tanö furi zangowuloi Fasömbata, lafendrongagö wolohe föna fasömbata, ba la'o'ö gofanöwa note zinunö (irama lagu).Fatua lö möi ira wolohe föna, ba imane Sangai Agendre:)

“Da tafasao wasömbatada andre föna Lowalangi,.....Muzizio ita fefu.....

Manunö ita moroi ba Mbuku Zinunö **numero : 261**

261. YA'E ZUMANGE

Ira'alawe

1. Ya'e zumange fasömbata, ma 'ohe sumange Yehowa.

Iramatua

- Reff*: Ma'andrö khö-U fahowu'ö zumange ni 'ohema khö-Mö
2. Ya'e zumange fasömbata mabe'e soroi ba dödöma.
Reff: Ma'andrö khö-U
 3. Ya'e zumange fasömbata buala si'otarai Nama.
Reff: Ma'andrö khö-U
 4. Ya'e zumange fasömbata, boto, noso, ba fa'aurima
Reff: Ma'andrö khö-U
 5. Ya'e zumange fasömbata, lö irugi zomasi dödö-U.
Reff: Ma'andrö khö-U
 6. Ya'e zumange fasömbata, ma'aohasi gölö Zo'aya.
Reff: Ma'andrö khö-U

FANGANDRÖ : (*Fangandrö nidönia'ö fasamösa zangowuloi fasömbata, aefa da'ö ba lafa'ema ba Danga zangai huhuo, itema'ö sangai huhuo awena itou'ö ba dete meza. Ba na so Wasömbata si sambua ni'ofulu, owasa wanaru ma owasavwamasi, btn ba itema'ö sangai huhuo si fao taroma Li Lowalangi si faudu ba wasömbata ni'owuloi andrö*)

8. KOOR/VOKAL GROUP

SA : Da tafaogö dödöda ba wanuno Lowalangi faoma sinunö ni'olohesi:
Koor ba Vokal Group
a. Koor Jemaat
b. Kegiatan komisi bapak
c. Kegiatan sektor II
d.

9. MANUNÖ

SA : Da tafa'anö dödöda wamondrondrongo taroma Li Lowalangi, manunö ita moroi Ba Mbuku Zinunö **numero 163**

163. UHONOGÖ SIBAI DÖDÖGU

1. Uhonogö siba dödögu ba wamondrondrongo li-Mö Yesu Mangalulu ndra'odo föna-U ba gametahö-Mö ia da'a Öbayoini Eheha-U Yesu dozigö mbanua samati khö-U. Ubokai dödögu khö-U Yesu nahia daroma li-U. TaromaliMö lö fa'atebulö menewi ma'ökhö ba si'ogötö'ö lö sa mamalö. Taroma li-Mö simöi fangabölö utema'ö soroi ba dödö, tolo ba wolo'ö.

10. HUHUA SEBUA

SH : Ya'irorogö dödömi, awö gera'erami fa'ohahau dödö andrö, khö Lowalangi, Sabölö moroi ba gera'era niha fefu, ba khö Keriso Yesu. Mangandrö ita.....Yaduhu.
a. Fombaso taroma Li Lowalangi **Heberaio 13:7-17 / Ibrani 13:7-17** (*Tuho Migu: Yesu no sondrönia'ö satulö / Yesus pemimpin yang benar.*) Fanuriagö
b. Nitanö ba dödö. **Mataio 23:10 / Matius 23:10** (*Ba böi ndramube'e töimi zolohe, me ha samösa zolohe ya'ami, Keriso. / Janganlah pula kamu disebut pemimpin, karena hanya satu pemimpinmu yaitu Mesias.*)
c. Fangandrö Fanga'aro'ö huhuo

SATO : Manunö : BZ. Numero 154 : 1

154. NO MAFONDRONDRONGO LIU

1. No mafondrondrongo li-U, Lowalangi So'aya.
Tanö ba dödöma ia, fa böi olifuga.
Fahowu'ö ia khöma, ena'ö ohahau dödöma fefu.
Heta ba dödö zi lö sökhi, ma'o'ö niwa'ö-U.

11. TUHO WAMATI

SA : Me no tarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida

SA+SATO : ❖ Ya'o mamati khö Lowalangi Ama si lö ambö fa'abölö, somböi banua si yawa awö danö.

- ❖ Ya' o mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.
- ❖ Ya' o mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

12. ANGOMBAKHATA BA MBANUA NIHA KERISO

13. SA : Da tafondrondrongo angombakhata:.....

14. MANUNÖ
SA

: Manunö ita moroi ba Mbuku Zinunö **numero: 247 ayati 1-2**

247. OHE MANÖ DANGAGU

do = d 4/4

MM = 96 - 104

1. Ohe manö dangagu fasao ndra'o.
Iruigi wa'amate ba aefa ö.
Tebai sa mofanödo na ha ya'o.
Ba heza sa Ötörö ba ohedo.
2. He Yesu ha Ya'ugö za'watöma.
Ba wogamö fa'auri ba khö Nama.
No saekhu ölö fefu ae ndra'aga.
Na tenga sa Ya'ugö, zi fao khöma.

15. FANGANDRÖ SALAHI + FAMATENGE + HOWUHOWU

SH : Muzizio ita fefu, mangandrö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

SH + SATO : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

SH : **FAMATENGE + HOWUHOWU :**
Mi'angawuli si fao fa'ohahau dödö, ya tobali ami sura Keriso, samaduhu'ö Ya'Ia ba Lala wa'aurimi sero ma'ökhö, ba mitema (tatema) howuhowu Lowalangi :
❖ Ya mufahowu'ö ami/ita Lowalangi, Ya murorogö ami/ita
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda
❖ Ya mufalemba hörö-Nia khömi/khöda, Ya mube'e wa ohahau dödö khömi/khöda fefu. Yaduhu

SATO : Manunö BZ.Numero **247 ayati 4**

247. OHE MANÖ DANGAGU

4. Fa'omasi-Mö khöma lö mamalö.
Dozi no Ötologa, Örorogö.

Ma'andrö na khö-U Yesu, ae tohugö.
Fasao ndra'aga fefu, ba zi so'Ö.

SH : YA'AHOWU

SATO : YA'AHOWU